

Lei 1/1986, do 29 de outubro, de presupostos xerais da Comunidade Autónoma de Galicia para 1986

Tramitación parlamentaria:

Proxecto de lei, BOPG núm. 34, do 21.6.1986.

Emendas, BOPG núm. 42, do 6.9.1986.

Debate de totalidade, DSPG núms. 22, do 10.9.1986; 25, do 11.9.1986, e 24, do 12.9.1986.

Informe da Ponencia, BOPG núm. 54, do 23.9.1986.

Dictame da Comisión, BOPG núm. 60, do 3.10.1986.

Mantemento de emendas e votos particulares, BOPG núm. 60, do 3.10.1986.

Debate e aprobación polo Pleno, DSPG núms. 27, do 7.10.1986; 28, do 8.10.1986, e 29, do 9.10.1986.

Publicación:

Boletín Oficial do Parlamento de Galicia núm. 70, do 23.10.1986.

Corrección de erros: BOPG núm. 77, do 7.11.1986.

Diario Oficial de Galicia núm. 214, do 3.11.1986.

Boletín Oficial del Estado núm. 17, do 20.1.1987.

Lei 1/1986, do 29 de outubro, de presupostos xerais da Comunidade Autónoma de Galicia para 1986

Polas leis 1/1987, de presupostos xerais da Comunidade Autónoma de Galicia para 1987; 2/1988, de presupostos xerais da Comunidade Autónoma galega para o ano 1988; 13/1988, de presupostos xerais da Comunidade Autónoma galega para 1989, e 2/1990, de presupostos xerais da Comunidade Autónoma galega para o ano 1990, mantívose a vixencia dos artigos 10, 11, 12 e 13.

O artigo 36 da Lei de Xestión Económica e Financeira Pública de Galicia establece o procedemento para a elaboración dos Presupostos Xerais da Comunidade Autónoma e, concretamente, no seu apartado 6, determina a documentación que debe acompañar ó Proxecto de Lei, esixindo a súa letra f), en relación co previsto na súa Disposición Transitoria cuarta, a partir do exercicio de 1987, a clasificación por programas dos Presupostos Xerais da Comunidade Autónoma.

Este mandato legal supón unha ruptura na tradición presupostaria no que se refire ó sistema de asignación dos recursos cara a unha presupostación orientada polos obxectivos da Administración Pública Galega.

Esta lei profundiza na liña emprendida no exercicio anterior, baseada en obxectivos e programas, tendo en conta o horizonte temporal da súa execución.

Ademais diso, e tratando de lle dar cumprimento ó principio de

universalidade presupostaria, inclúense os Presupostos da Comunidade Autónoma e os correspondentes ós servizos traspasados do INSERSO, os da Compañía de Radio-Televisión de Galicia e os das súas Sociedades xestoras, así como os estados financeiros das empresas públicas galegas.

Así mesmo, a necesidade de adaptar a unha situación presupostaria concreta as disposicións contidas na Lei 3/1984, de Xestión Económica e Financeira Pública de Galicia, determina a inclusión no articulado da Lei de Presupostos daqueles preceptos que completan o marco normativo axeitado á conxuntura presupostaria, dándolles así resposta ás esixencias de conseguir unha maior racionalidade e eficacia nos gastos públicos, para o que se incorporan novas medidas de axilización na xestión do Presupuesto.

Por todo o exposto, o Parlamento de Galicia aprobou e eu, de conformidade co artigo 13.2 do Esta-

tuto de Galicia e co artigo 24 da Lei 1/1983, do 22 de febreiro, reguladora da Xunta e do seu Presidente, promulgo, en nome de El-Rei, a Lei de Presupostos Xerais da Comunidade Autónoma de Galicia para 1986.

Título I

Dos créditos e das súas modificacións

Capítulo I

Créditos iniciais e financiación dos mesmos

Artigo 1. Dos créditos iniciais.

1. Apróbanse os Presupostos Xerais da Comunidade Autónoma de Galicia para o exercicio de 1986 integrados por:

a) O Presuposto da Comunidade Autónoma.

b) O Presuposto dos servicios traspasados do Instituto Nacional de Servicios Sociais.

c) O Presuposto da Compañía de Radio-Televisión de Galicia e os das Sociedades para a xestión dos Servicios Públicos da Radiodifusión e Televisión.

d) Os Presupostos das empresas públicas galegas.

2. No Estado de Gastos do Presuposto da Comunidade Autónoma concédense créditos por un importe total de pesetas 137.007.765.641.

O Presuposto de Gastos da Comunidade Autónoma financiarase:

a) Cos dereitos económicos que se liquidarán durante o exercicio, que se detallan no Estado de Ingresos, estimados nun importe total de 132.207.765.641 pesetas.

b) Co importe das operacións de endebedamento que se expresan no artigo 23 desta Lei.

Os beneficios fiscais que afectan ós tributos cedidos á Comunidade Autónoma estímanse en pesetas 1.001.344.000.

3. O Presuposto dos servicios traspasados do Instituto Nacional de Servicios Sociais financiarase con cargo ás consignacións fixadas para este efecto na Lei 46/85, do 27 de decembro, de acordo co previsto no Real Decreto 258/85, do 23 de xaneiro, e que para o presente exercicio ascende a pesetas 3.187.967.112.

4. No Presuposto da Compañía de Radio-Televisión de Galicia concédense as dotacións precisas para atender ó desenvolvemento das súas actividades, por un importe total de 298.988.000 pesetas, que se financiará mediante transferencia do Presuposto da Comunidade Autónoma polo citado importe.

Os Presupostos das Sociedades para a xestión dos Servicios Públicos de Radiodifusión e Televisión ós que se refire á Lei 9/84, do 11 de xullo, apróbanse co seguinte detalle:

A) Á Sociedade Xestora do Servicio Público de Radiodifusión: 299.861.000 pesetas, que se financiarán mediante transferencia do Presuposto da Comunidade Autónoma polo devandito importe.

B) Á Sociedade Xestora do Servicio Público de Televisión: 2.805.465.000 pesetas, que se financiarán:

a) Cos dereitos económicos que se van liquidar, estimados en 824.314.000 pesetas.

b) Mediante transferencias do Presuposto da Comunidade Autónoma por importe de pesetas 1.981.151.000.

5. Nos Presupostos das empresas públicas galegas inclúense as estimacións e previsións de gastos e ingresos referidos ós mesmos e ós seus estados financeiros, en atención á peculiaridade da súa actividade específica.

Artigo 2. Agrupacións dos créditos.

Os créditos incluídos nos Estados de Gastos dos Presupostos da Comunidade Autónoma financiarán os programas de gastos que se inclúen nos referidos Estados para a consecución dos obxectivos dos mesmos. O seu importe ascende a 137.007.765.641 pesetas, agrupándose os créditos en atención á índole da función que hai que realizar e por contías, en pesetas, do seguinte modo:

Alta dirección da Comunidade Autónoma	671.099.578
Administración xeral	2.238.007.492
Xusticia	931.765.525
Administración electoral e partidos políticos	145.000.000
Seguridade Social e protección social	9.988.079.213
Promoción social	6.217.878.098
Sanidade	4.613.717.342
Educación	54.589.256.286
Vivenda	5.481.093.900
Benestar comunitario	1.079.841.075
Cultura	2.136.332.798
Outros servicios comunitarios e sociais	3.171.310.000
Infraestruturas básicas e de transporte	8.089.120.268
Outras infraestruturas	3.229.500.000
Investigación científica, técnica e aplicada	309.250.000
Información estadística básica	44.969.452
Actuacións económicas xerais	399.218.114
Comercio	376.240.737
Actividades financeiras	1.148.000.594
Agricultura, gandería e pesca	9.616.748.413
Industria	1.736.143.531
Enerxía	747.170.000
Minería	67.250.000
Turismo	730.965.602
Reordenación industrial	571.912.783
Desenvolvemento empresarial	601.333.000
Transferencias entidades locais	16.679.936.840
Débeda Pública	1.396.625.000

Artigo 3. Vinculación dos créditos.

Os créditos imputables ós respectivos programas de gasto teñen carácter limitativo e vinculante, con subxección á clasificación ou ordenación dos mesmos, orgánica e económica, a nivel de conceptos e por programas. Non obstante, os créditos incluídos no Capítulo II, da clasificación económica do gasto, terán, excepcionalmente, carácter vinculante a nivel de artigo en lugar de a nivel de concepto.

En todo caso, terán carácter vinculante os créditos declarados ampliables, que necesariamente deberán ser aplicados ó tipo de gasto derivado da súa clasificación económica, tal como aparece especificado no Estado de Gastos do Presuposto.

Capítulo II

Normas de modificación de créditos presupostarios

Artigo 4. Principios xerais.

1. As modificacións dos créditos iniciais do Presuposto axustaranse ó que se estableza na Lei de Xestión Económica e Financeira Pública de Galicia, agás o disposto nos artigos seguintes.

2. Calquera acordo de modificación presupostaria deberá indicalo programa, o servizo e o concepto afectado polo mesmo.

A respectiva proposta de modificación deberá cuantificala incidencia na consecución dos respectivos obxectivos de gasto e as razóns concretas que a xustifican.

3. Dentro dos quince días hábiles seguintes á terminación de cada mes, a Consellería de Economía e Facenda daralle conta á Comisión de Economía, Facenda e Presupostos do Parlamento de tódalas modificacións acordadas ó amparo do establecido na presente Lei.

No suposto de que no citado período non se producisen modificacións de créditos, farase constar expresamente á Comisión de Economía, Facenda e Presupostos tal circunstancia no mesmo prazo establecido no parágrafo anterior.

Artigo 5. Transferencias de créditos.

1. As transferencias de créditos de calquera tipo estarán suxeitas ás seguintes limitacións:

a) Non poderán afectar a créditos ampliables nin ós extraordinarios concedidos durante o exercicio.

b) Non minorarán créditos que fosen incrementados con suplementos ou transferencias, nin poderán afectar negativamente ós créditos incorporados como consecuencia de remanentes procedentes de exercicios anteriores.

c) Non incrementarán créditos que como consecuencia doutras transferencias fosen obxecto de minoración.

d) O establecido no número anterior enténdese sen prexuício do que dispón o artigo 43 da Lei 3/1984, do 3 de abril, de Xestión Económica e Financeira Pública de Galicia, en relación cos novos trasposos de medios persoais e materiais da Administración Central á Autónoma de Galicia.

Artigo 6. Competencias das Consellerías e dos altos órganos estatutarios da Comunidade.

1. Os titulares das Consellerías poderán realizar, logo de informe da Intervención Delegada correspondente, as seguintes modificacións presupostarias:

1.1.— Dentro do Capítulo II e entre os seus diferentes conceptos, cando correspondan a un mesmo programa dun mesmo ou diferente servizo da Consellería, sempre que non supoña desviación na consecución dos obxectivos do programa respectivo.

En caso de informe desfavorable da Intervención Delegada coa proposta de transferencia de crédito, remitirase o expediente á Consellería de Economía e Facenda para efectos de resolución procedente polo titular desta Consellería.

1.2.— Xeración de créditos.

Nos supostos contemplados no artigo 52, apartado 1.a), e no artigo 53 da Lei de Xestión Económica e Financeira Pública de Galicia, cando o pagamento indebido fose realizado no mesmo exercicio.

2. Os presidentes dos altos órganos estatutarios da Comunidade Autónoma terán as mesmas competencias establecidas neste artigo, en relación coas modificacións presupostarias, do Presuposto de gastos respectivo, sen prexuício do principio de autonomía presupostaria do Parlamento de Galicia.

3. En todo caso, unha vez acordadas as modificacións presupostarias incluídas nos números ante-

riores, remitiranse á Consellería de Economía e Facenda, Dirección Xeral de Presupostos e do Tesouro, para instrumentala súa execución.

Artigo 7. Competencias da Consellería de Economía e Facenda.

1.a) Resolve-los expedientes de transferencias de créditos nos supostos previstos no artigo anterior, cando discrepe a Consellería respectiva co informe da Intervención Delegada.

1.b) Autorizar transferencias de créditos, calquera que sexa o Capítulo, entre un ou varios programas incluídos na mesma función correspondente a servizos de unha Consellería.

A competencia prevista para autorizar transferencias de créditos contidas neste artigo comporta a creación dos conceptos pertinentes da clasificación económica do gasto.

2. Incorporación de créditos.

2.1.— Autoriza-las incorporacións de créditos procedentes de transferencias dos Presupostos Xerais do Estado en concepto de subvencións non integradas no custo efectivo dos servizos pasados.

Os créditos así incorporados deberán aplicarse ás finalidades para as que foron acordados.

2.2.— Autoriza-las incorporacións de créditos previstas no artigo 46 da Lei de Xestión Económica e Financeira Pública de Galicia.

3. Xeración de créditos.

3.1.— Autoriza-la xeración de créditos derivados de ingresos procedentes de transferencias que o Estado realice para a Comunidade Autónoma tanto para a financiación dos servicios coma para investimentos reais que realice a Xunta. Os créditos así xerados deberán aplicarse nos supostos non incluídos no artigo anterior desta Lei.

3.2.— Autoriza-la xeración de créditos prevista no artigo 52 da Lei de Xestión Económica e Financeira Pública de Galicia nos supostos non incluídos no artigo anterior desta Lei.

4. Ampliación de créditos.

Autorizar, ata unha suma igual ás obrigas de recoñecemento preceptivo, a ampliación dos créditos que, incluídos nos Presupostos Xerais da Comunidade Autónoma, se detallan a continuación:

Aplicable a tódalas seccións e programas:

Os destinados a satisfacer:

a) As cuotas de Seguridade Social e o complemento familiar (axuda ou indemnización familiar), de acordo cos preceptos en vigor, o subsidio familiar do persoal adscrito ós servicios da Comunidade Autónoma con dereito á súa percepción, así como a aportación que, no seu caso, poida corresponder á Comunidade Autónoma ó réxime de previsión social dos seus funcionarios.

b) Os trienios derivados do cómputo do tempo de servicios realmente prestados á Administración.

c) Os créditos destinados ó pagamento do persoal ó servicio da Comunidade Autónoma, en canto precisen ser incrementados como consecuencia de elevacións salariais dispostas durante o exercicio ou en exercicios anteriores por modificación do salario interprofesional ou veñan impostos por regulación legal ou por decisión firme xurisdiccional.

d) As prestacións regulamentarias e obrigatorias do réxime de previsión dos funcionarios públicos.

e) Os créditos destinados a satisfacer obrigas derivadas da Débeda Pública, emitida pola Comunidade Autónoma, tanto por intereses e amortizacións de principal coma por gastos derivados das operacións de conversión e cambio da mesma.

f) Os destinados a satisfacerlo pagamento das subvencións non integradas no custo efectivo dos servicios traspasados á Comunidade Autónoma, nun importe que exceda da contía inicial prevista, como consecuencia de transferencias de fondos efectuadas con cargo ós Presupostos Xerais do Estado.

g) Os créditos destinados a satisfacer-las cantidades que deben percibi-los Liquidadores de Distri-

to Hipotecario en concepto de indemnización e compensación dos gastos orixinados pola recadación e xestión de autoliquidacións practicadas polo Imposto sobre Transmisións Patrimoniais e Actos Xurídicos Documentados.

h) Os créditos destinados ó pagamento de cuotas ou contribucións a organismos internacionais nos que participe ou sexa membro a Comunidade Autónoma.

i) Os créditos destinados ó pagamento das obrigas derivadas de quebrantamentos en operacións de crédito avaladas pola Xunta de Galicia.

Artigo 8. Competencias do Consello da Xunta.

1. Correspóndelle ó Consello da Xunta, a proposta do Conselleiro de Economía e Facenda, a iniciativa da Consellería ou Consellerías afectadas, autoriza-la transferencia de créditos entre programas de unha mesma ou distintas Consellerías, incluídos no mesmo grupo de funcións.

Cada solicitude da ou das Consellerías afectadas irá acompañada dunha memoria xustificativa dos obxectivos fixados inicialmente e dos novos que no seu caso puidesen derivarse.

2. De cada modificación acordada en virtude do disposto neste artigo, darase conta, de xeito inmediato e singular, no prazo de cinco días á Comisión de Economía, Facenda e Presupostos con

remisión da copia do correspondente expediente.

Artigo 9. Outras modificacións presupostarias.

1. Con independencia das modificacións presupostarias ás que se refiren os artigos anteriores, a Consellería de Economía e Facenda poderá autorizar transferencias de crédito desde o programa de imprevistos ós conceptos e artigos dos demais programas de gasto con subxección ós seguintes requisitos:

a) A Consellería ou alto órgano estatutario que solicite a transferencia deberá xustificala imposibilidade de atender as insuficiencias a través das modificacións presupostarias que se autorizan en virtude do previsto nos artigos anteriores desta Lei.

b) A transferencia deberá ser solicitada a través dun exame conxunto ou previsión das necesidades do correspondente programa de gasto, indicando, no seu caso, as desviacións que a execución do Presuposto poida revelar na consecución dos correspondentes obxectivos.

2. Excepcionalmente a Consellería de Economía e Facenda poderá autoriza-la habilitación de créditos, mediante a creación dos conceptos pertinentes, para supostos en que, na execución do Presuposto, se plantexen necesidades non contempladas de forma directa no mesmo.

Neste suposto e con cargo ó programa de imprevistos, poderanse efectuar as oportunas transferencias ó Presuposto respectivo mediante a creación no mesmo dos pertinentes conceptos presupostarios.

3. A autorización prevista nos dous números anteriores comporta a de realizar as transferencias entre si de tódolos créditos do programa de imprevistos e funcións non clasificadas, calquera que sexa o Capítulo ó que pertencen, mediante a creación, no seu caso, dos correspondentes conceptos presupostarios.

4. Correspóndelle ó Consello da Xunta, a proposta do Conselleiro de Economía e Facenda, autorizar as transferencias ós distintos conceptos do programa de imprevistos e funcións non clasificadas, habilitando para tal efecto os créditos que sexan necesarios, das dotacións non utilizadas nos programas das distintas seccións do Presuposto, para a súa ulterior reasignación.

Capítulo III

Da execución e liquidación do Presuposto

Artigo 10. Pagamentos que hai que xustificar.

1. As Consellerías establecerán, logo do informe da Intervención Xeral, as normas que regulen a expedición de orde de pagamento que hai que xustificar con cargo ós

seus respectivos presupostos de gastos, determinando os límites cuantitativos e os conceptos ós que sexan aplicables.

Como regra xeral poderanse librar ordes de pagamento que hai que xustificar nos casos nos que non se poidan acompañar os documentos xustificativos antes da súa expedición e naqueles outros nos que se considere imprescindible para axilizar a xestión dos créditos.

En caso de discrepancia da Intervención Xeral, resolverá o Conselleiro de Economía e Facenda.

2. Para as atencións de carácter periódico ou repetitivo, os fondos librados que hai que xustificar poderán ter o carácter de anticipo de caixa fixa.

Os perceptores destes fondos quedan obrigados a xustificar a aplicación das cantidades percibidas e ó reintegro das non investidas, como máximo, dentro do exercicio presupostario.⁽¹⁾

Artigo 11. Da ordenación de pagamentos.

Os ordenadores de pagamentos poderán librar as ordes a que se

(1) Reprodúcese a versión orixinaria. O artigo 10 foi mantido na súa vixencia pola disposición adicional terceira da Lei 1/1987, pola disposición adicional cuarta da Lei 2/1988, pola disposición adicional segunda da Lei 13/1988 e pola disposición adicional segunda da Lei 2/1990.

refire o artigo 58 da Lei de Xestión Económica e Financeira Pública de Galicia a través da información recibida das Intervencións Delegadas, por medios informáticos.

Neste suposto a documentación xustificada das mesmas poderá quedar naqueles centros nos que se recoñecesen as correspondentes obrigas para a súa remisión ó Tribunal de Contas.

A referencia que os artigos 95.2 e 96.c) da Lei de Xestión Económica e Financeira Pública de Galicia fan ás responsabilidades dos ordenadores de pagamentos, entenderase referida ás autoridades ou órganos superiores da Comunidade que dispoñan dos créditos e que recoñezan as obrigas.⁽²⁾

Artigo 12. Liquidacións do Presuposto.

O Presuposto de cada exercicio liquidarase en canto á recadación dos dereitos liquidados e ó pagamento das obrigas recoñecidas o día 31 de decembro do ano natural correspondente, entendéndose modificado neste senso o artigo 59.1 da Lei de Xestión Económica e Financeira Pública de Galicia.

(2) Reprodúcese a versión orixinaria. O artigo 11 foi mantido na súa vixencia pola disposición adicional terceira da Lei 1/1987, pola disposición adicional cuarta da Lei 2/1988, pola disposición adicional segunda da Lei 13/1988 e pola disposición adicional segunda da Lei 2/1990.

Tódolos dereitos pendentes de cobro e as obrigas pendentes de pagamento á liquidación do Presuposto quedarán afectados á Tesorería da Comunidade Autónoma, segundo as súas respectivas contraccións.⁽³⁾

Artigo 13. Obrigas de exercicios pechados e imputacións de créditos.

1. A Consellería de Economía e Facenda poderá incorporar ó Presuposto os remanentes de créditos do Capítulo II anulados en exercicios anteriores, que servirán de base para o recoñecemento de obrigas de exercicios pechados.

2. A Consellería de Economía e Facenda poderá determina-los créditos do exercicio corrente ós que excepcionalmente poderá imputarse o pagamento de obrigas recoñecidas ou xeradas en exercicios anteriores.

3. A Consellería de Economía e Facenda daralle conta bimensualmente á Comisión de Economía, Facenda e Presupostos do Parlamento das obrigas recoñecidas de exercicios pechados e das imputacións previstas nos números anteriores, en caso de que as houbese.

(3) Reprodúcese a versión orixinaria. O artigo 12 foi mantido na súa vixencia pola disposición adicional terceira da Lei 1/1987, pola disposición adicional cuarta da Lei 2/1988, pola disposición adicional segunda da Lei 13/1988 e pola disposición adicional segunda da Lei 2/1990.

4. Regulamentariamente fixárase o procedemento para o recoñecemento de obrigas de exercicios pechados e para a imputación prevista no número 2 anterior.⁽⁴⁾

Título II

Dos gastos do persoal

Capítulo I

Retribucións do persoal

Artigo 14. Aumento de retribucións do persoal ó servizo da Comunidade Autónoma.

1. Con efectos do 1 de xaneiro de 1986, o incremento conxunto das retribucións íntegras do persoal ó servizo da Comunidade Autónoma, non sometido á lexislación laboral, aplicadas nas contías e de acordo cos réximes retributivos vixentes en 1985, será do 7,20 por 100, sen prexuício do resultado individual da aplicación do dito incremento.

2. O disposto no número anterior é aplicable ó persoal, non laboral, ó servizo de:

a) Os altos órganos estatutarios de Galicia, sen prexuício do dis-

posto no artigo 12.2 do Estatuto de Galicia para o Parlamento.

b) A Administración da Comunidade Autónoma.

c) O restante persoal ó que resulte de aplicación o réxime estatutario dos funcionarios públicos.

d) A Compañía de Radio-Televisión de Galicia e as Sociedades para a xestión dos Servizos Públicos de Radiodifusión e Televisión.

3. Así mesmo, e con efectos do 1 de xaneiro de 1986, a masa salarial do persoal laboral ó servizo dos entes e organismos a que se refire o número 2 anterior, non poderá experimentar un incremento global superior ó 7,20 por 100, en cómputo anual, comprendendo na devandita porcentaxe o de tódolos conceptos así como o que se poida producir por antigüidade e reclasificacións profesionais, e sen prexuício do resultado individual da distribución do devandito incremento global.

Entenderase por masa salarial, para efectos desta Lei, o conxunto de retribucións salariais e extrasalariais e gastos de acción social que o persoal laboral afectado tivese dereito a percibir durante o ano 1985 e informados favorablemente pola Consellería de Economía e Facenda para o devandito exercicio presupostario, exceptuándose, en todo caso:

a) As prestacións ou indemnizacións da Seguridade Social.

(4) Reprodúcese a versión orixinaria. O artigo 13 foi mantido na súa vixencia pola disposición adicional terceira da Lei 1/1987, pola disposición adicional cuarta da Lei 2/1988, pola disposición adicional segunda da Lei 13/1988 e pola disposición adicional segunda da Lei 2/1990.

b) As cotizacións ó sistema da Seguridade Social a cargo do empregador.

c) As indemnizacións correspondentes a traslados, suspensións ou despidos.

d) As indemnizacións ou supridos por gastos que tivese que realiza-lo traballador.

Os incrementos da masa salarial bruta calcularanse en términos de homoxeneidade respecto dos dous períodos obxecto de comparación, tanto no que respecta a efectivos reais de persoal laboral coma ó réxime privativo de traballo, xornada legal ou contractual, horas extraordinarias efectuadas e outras condicións laborais, computándose, en consecuencia, por separado, as cantidades que correspondan á variación de tales conceptos. Con cargo á masa salarial así obtida para 1986 deberase satisfacer a totalidade das retribucións do persoal derivadas do correspondente pacto e tódalas ás que haxa dereito recoñecido e liquidado a percibir ó longo do ano 1986.

As indemnizacións ou supridos deste persoal non poderán experimentar crecementos superiores ós que se establezan con carácter xeral para o persoal non laboral da Administración Central do Estado.

No suposto en que, da aplicación do incremento porcentual establecido no parágrafo anterior, resultase unha cifra inferior á que corresponda ó persoal non laboral

de igual categoría, poderán acordarse indemnizacións ou supridos ata o importe que teña recoñecido o citado persoal non laboral.

O regulado nos parágrafos anteriores non será de aplicación ás indemnizacións que se establezan por primeira vez nos respectivos convenios; unha vez fixado o importe de tódalas indemnizacións, os posteriores incrementos axustaranse ó establecido nas Leis de Presupostos.

4. Con independencia do disposto nos parágrafos anteriores, establécese un fondo por importe de 45 millóns de pesetas, con cargo ó que se poderán pactar incrementos adicionais da masa salarial, co fin de acadar unha maior harmonización nas condicións retributivas e demais condicións de traballo do persoal laboral que presta os seus servicios na Administración Autónoma. A súa distribución, dentro dos límites indicados, será realizada previa negociación coas centrais sindicais máis representativas.

5. Así mesmo, establécese un fondo con cargo ó programa 531 H partida 005.002.120.0 por un importe mínimo de 45 millóns con cargo ó cal se poderán homologar as retribucións dos funcionarios de acordo co establecido na Lei de Medidas para a Reforma da Función Pública.

Artigo 15. Retribucións dos altos cargos.

Sen prexuício da asimilación prevista na Disposición Adicional

segunda da Lei 1/1985, do 10 de xaneiro, de Presupostos Xerais da Comunidade Autónoma de Galicia, as retribucións totais e exclusivas dos altos cargos fíxanse para o ano de 1986 nas seguintes contías, incluídas as pagas extraordinarias:

Presidente	7.766.844 pts.
Vicepresidente	6.960.636 pts.
Conseheiro	6.395.822 pts.
Secretarios Xerais Técnicos, Directores Xerais e asimilados	5.091.894 pts.

Artigo 16. Retribucións dos funcionarios eventuais, interinos e contratados administrativos.

1. As retribucións dos funcionarios eventuais, interinos e contratados administrativos experimentarán un incremento retributivo do 7,20 por 100 con respecto ás recoñecidas no ano 1985.

2. Os funcionarios interinos que se nomeen en 1986 percibirán o 80% das retribucións básicas, excluídos trienios e grao inicial correspondentes ó grupo no que se inclúe o corpo en que ocupen vacante, e o 100 por 100 das retribucións complementarias que correspondan ó posto de traballo que desempeñen.

Artigo 17. Requisito para a sinatura de convenios colectivos que afecten ó persoal laboral.

1. Para os efectos previstos no artigo 14.3 desta Lei, para poder

pactar novos convenios colectivos, negociar ou aplicar revisións salariais, adhesións ou acorda-la extensión, en todo ou en parte, a outros convenios xa existentes do sector público, así como para poder aplicar convenios colectivos de ámbito sectorial ou revisións salariais dos mesmos, e para outorgar melloras retributivas unilaterais con carácter individual ou colectivo, será necesario o informe previo da Dirección Xeral de Presupostos e do Tesouro da Consellería de Economía e Facenda en canto afecten ó persoal non funcionario de:

a) A Administración da Comunidade Autónoma.

b) Os Consellos de Cultura Galega e Contas, en caso de que se constituíse no presente exercicio presupostario.

c) A Compañía de Radio-Televisión de Galicia e as súas Sociedades xestoras.

2. Para este fin, a Consellería ou ente correspondente remitirá, con carácter previo á sinatura das partes negociadoras, o proxecto de pacto ou mellora respectiva, ó que se deberá acompañar:

a) Certificación das retribucións satisfeitas durante 1985 ou que se van facer efectivas con cargo a 1985 ó persoal afectado.

b) Homoxeneizacións practica-das como consecuencia do disposto nesta Lei.

c) A masa salarial para 1986 conforme á valoración de tódolos

aspectos económicos derivados do proxecto. A súa contía non poderá exceder da autorizada previamente pola Consellería de Economía e Facenda con anterioridade ó inicio das negociacións.

3. O informe será emitido no prazo máximo de quince días, que se contará desde a data de recepción do proxecto de pacto, e versará sobre todos aqueles extremos dos que se deriven consecuencias directas ou indirectas en materia de gasto público, tanto para o ano 1986 coma para exercicios futuros, e especialmente no que respecta á determinación da masa salarial correspondente e ó control do seu crecemento.

Transcorrido o referido prazo e quince días máis sen que o antedito informe fose emitido, este considerárase favorable ó proxecto de pacto.

4. Serán nulos de pleno dereito os acordos adoptados nesta materia con omisión do trámite de informe, así como aqueles que impliquen, para os vindeiros exercicios, crecementos salariais contrarios ós que determinen as futuras Leis de Presupostos Xerais da Comunidade Autónoma.

Artigo 18. Prohibición de ingresos atípicos.

Os empregados públicos comprendidos dentro do ámbito de aplicación da presente Lei, non sendo os sometidos ó réxime de arancel, non poderán percibir ningunha participación nos tributos,

comisións ou outros ingresos de calquera natureza que a Administración Autónoma ou calquera poder público estatutario teña dereito a percibir como contra-prestación de calquera servizo ou xurisdicción.

Artigo 19. Modificación do cadro de persoal.

Durante o exercicio de 1986 non se tramitarán expedientes de ampliación do cadro de persoal, agás os que se orixinen como consecuencia de traspaso de funcións e servizos á Comunidade Autónoma.

Artigo 20. Contratación de persoal laboral con cargo ós créditos de investimentos.

1. Durante o exercicio de 1986 non se poderá contratar persoal novo con cargo a créditos de investimento.

Excepcionalmente, as Consellerías poderán contratar persoal en réxime laboral de carácter temporal cando o necesiten inescusablemente para a realización por administración directa de obras ou servizos incluídos nos Presupostos.

2. Esta contratación precisará o informe favorable da Consellería de Economía e Facenda, despois da acreditación da necesidade da mesma por carecer de suficiente persoal fixo ou de crédito suficiente no concepto presupostario destinado á contratación de persoal eventual no Capítulo correspondente.

3. Os contratos deberanse formalizar seguindo as prescricións da lexislación vixente e neles farase constar a obra ou servizo para a realización dos cales se formaliza o contrato e o tempo de duración, así como o resto das formalidades que impón a lexislación sobre contratos laborais eventuais ou temporais.

Os incrementos destas obrigas formais, así como a asignación de persoal contratado para funcións distintas das que se determinen nos contratos, dos que se puidesen derivar dereitos de fixeza para o persoal contratado, poderán ser obxecto de dedución de responsabilidade, de conformidade co artigo 95 da Lei 3/1984, de Xestión Económica e Financeira Pública de Galicia.

Artigo 21. Normas especiais.

1. En canto non se poña en vigor o sistema retributivo fixado na Lei 30/84, cando un funcionario non sometido ó réxime retributivo regulado no Real Decreto-Lei 22/1977, do 30 de marzo, ocupe un posto de traballo dotado no cadro de persoal presupostario da Comunidade, percibirá as retribucións básicas e complementarias correspondentes á praza que desempeñe.

Para os efectos do disposto no parágrafo anterior, a Consellería de Economía e Facenda, a proposta das Consellerías interesadas, autorizará a oportuna asimilación para determina-las retribucións

que correspondan ós citados funcionarios.

2. As diferentes retribucións que conforme ó disposto nos artigos anteriores corresponda percibir ó persoal ó servizo das institucións da Comunidade Autónoma, faranse efectivas por un só habilitado con cargo ós créditos do programa respectivo.

3. As indemnizacións por razón do servizo incrementaranse nun 7,20% respecto das contías vixentes a 31 de decembro de 1985.

4. Cando, con subxección á normativa vixente, o funcionario realice unha xornada inferior á normal, reduciranse as súas retribucións na proporción correspondente, na forma prevista na devandita normativa.

Título III

Das operacións financeiras

Capítulo I

Avales

Artigo 22. Avales.

1. Durante 1986 a Xunta de Galicia poderá conceder avales de acordo co establecido nos artigos 73 e seguintes da Lei 3/1984, do 3 de abril, de Xestión Económica e Financeira Pública de Galicia, e co disposto nesta Lei ata un importe global máximo de 4.000 millóns de pesetas.

2. Primeiro aval ata un importe de 2.500 millóns.

a) Os créditos concertados polas Corporacións Locais destinadas a financiar proxectos de investimento.

b) Ademais dos avales recollidos no apartado anterior, a Comunidade Autónoma poderá conceder, nas condicións que regulamentariamente se establezan, aval subsidiario ós créditos concertados polas empresas e ás operacións que se especifican:

1.º) Ós armadores de buques por encargos a empresas privadas do sector naval domiciliadas en Galicia, mentres non sexa tecnicamente posible a constitución de hipoteca naval dos buques en construción.

2.º) Ás empresas que se acollan ós beneficios establecidos pola Comunidade Autónoma para a creación e mantemento de empresas, sempre que os créditos para os que solicitan aval teñan como finalidade a financiación de investimentos, e as participadas por SODIGA para a financiación de investimentos.

3.º) A operacións de investimento realizadas por cooperativas e traballadores autónomos da Comunidade Autónoma.

4.º) A operacións de refinanciación de exportacións de empresas privadas galegas.

5.º) A operacións de investimento e saneamento financeiro reali-

zadas por Sociedades anónimas laborais e Cooperativas de traballadores.

6.º) Na distribución e adjudicación dos avales regulamentados neste artigo establecerase unha prioridade en función da conxunción dos seguintes criterios:

a) Sociedades anónimas laborais e Cooperativas de traballadores.

b) Iniciativas que supoñan alternativas reais de saída para factorías, empresas ou sectores en crise.

c) Empresas de sectores punta ou de potencial relevancia para o desenvolvemento económico da Comunidade Autónoma de Galicia.

d) Iniciativas empresariais que supoñan unha maior captación de mercados exteriores.

3. Aval complementario ata 1.500 millóns.

Poderá concederse un aval complementario ó prestado polas Sociedades de Garantía Recíproca galegas que cubra a maior contía solicitada sobre a máxima que estatutariamente poidan outorgar estas institucións ás empresas privadas domiciliadas na Comunidade Autónoma en créditos que teñan como finalidade a financiación de investimentos ou de contratos de subministro con empresas públicas ou privadas.

4. A contía dos avales, por beneficiario e apartado, non poderá exceder do 5% da cantidade global establecida no número 1

deste artigo. Este límite será do 10% nos avales que se poidan conceder ó amparo do disposto no apartado 2.b).2.º deste artigo.

Para os efectos de fixa-los límites anteriores, acumularanse os avales vixentes xa concedidos.

5. Os avales que se concedan ó amparo do disposto nos apartados anteriores garantirán un máximo do 80% final da contía da operación para a que se concede o aval.

6. A Xunta daralle conta, trimestralmente, á Comisión de Economía, Facenda e Presupostos do Parlamento dos avales concedidos ó amparo do presente artigo.

Capítulo II

Operacións de crédito

Artigo 23. Operacións de crédito.

1. Autorízase ó Consello da Xunta para que, a proposta do Conselleiro de Economía e Facenda, emita Débeda Pública ou concerte operacións de crédito amortizable, interior ou exterior, por prazo superior a un ano e por importe máximo de 4.800.000.000 de pesetas.

2. Autorízase ó Conselleiro de Economía e Facenda para que:

a) Sinala o tipo de interés, condicións, beneficios fiscais legalmente establecidos e demais características das operacións de endebedamento sinaladas no nú-

mero anterior e formalice, no seu caso, en representación da Comunidade Autónoma, tales operacións.

b) Concerte operacións de intercambio financeiro relativas a operacións de crédito existentes con anterioridade, para obter un menor custo ou unha mellor distribución da carga financeira ou previ-los posibles efectos negativos derivados das fluctuacións nas condicións de mercado.

3. Autorízase ó Consello para que, a proposta do Conselleiro de Economía e Facenda, formalice operacións de crédito, e ata un importe máximo de 1.863.252.900 pesetas, que deberán ser amortizados dentro do ano natural correspondente ó exercicio presupostario, destinados a financiar operacións de Tesourería derivadas da diferenza de vencemento dos seus pagamentos e ingresos.

O Consello da Xunta, a proposta do Conselleiro de Economía e Facenda, fixará as características das operacións de endebedamento que autoriza esta disposición.

4. As operacións que se realicen ó amparo da autorización a que fai referencia o número 1 deste artigo poderanse formalizar no decurso de 1987.

5. A Xunta daralle conta á Comisión de Economía, Facenda e Presupostos do Parlamento de tódalas operacións que se realicen ó amparo das autorizacións concedidas no presente artigo.

Título IV

Normas tributarias

Capítulo único

Artigo 24. Precios públicos.

Os precios públicos definidos no artigo 18 da Lei 1/1985, de Presupostos Xerais da Comunidade Autónoma, poderán ser modificados polo Consello da Xunta, a proposta da Consellería de Economía e Facenda, na contía necesaria para mante-lo nivel de prestación dos mesmos, en función dos respectivos custos de funcionamento.

Artigo 25. Taxas.

1. Elévanse os tipos das taxas de contía fixa, por prestación de servizos e por realización de actividades a que se refire o artigo 7.2 da LOFCA, ata a cantidade que resulte da aplicación do coeficiente do 1,10 ás contías actualmente esixibles.

2. Para os efectos do apartado anterior considéranse taxas de contía fixa aquelas nas que a cuota tributaria non estea fixada nunha porcentaxe da base ou esta non se valore en unidades monetarias.

Título V

Dos procedementos de xestión presupostaria

Artigo 26. Contía mínima de aprobación de gastos de investimento.

1. A realización de gastos de investimento de calquera natureza, en contía superior a 200 millóns de pesetas, requirirá a aprobación polo Consello da Xunta.

2. Autorízaselles ós órganos de contratación, con carácter xeral, a tramitación urxente, prevista no artigo 26 da Lei de Contratos do Estado, para a contratación de obras de ata 100 millóns de pesetas, se ben o prazo de presentación de proposicións non será inferior a quince días.

3. Para os efectos do que se establece no número anterior, os órganos de contratación da Xunta son os Conselleiros da mesma.

Artigo 27. Outros gastos de investimento.

Coa finalidade de apoia-los investimentos que tivesen que ser realizados na creación de novas empresas ou na súa ampliación ou modernización, o Consello da Xunta, a proposta de Consellería de Economía e Facenda, poderá adquirir compromisos de gasto que se puidesen estender a exercicios posteriores a aquel no que se autoricen, que consistan en axudas para apoio financeiro, ou en subvencións ó investimento realizado, dándolle conta á Comisión de Economía, Facenda e Presupostos.

Disposición adicional primeira

As dotacións presupostarias da sección 01, Parlamento, librananse

en firme e periodicamente a nome do mesmo, a medida que este o requira, e non estarán suxeitas a xustificación ningunha ante o Goberno Autónomo.

Disposición adicional segunda

Co obxecto de facer efectiva a solidariedade intraterritorial en Galicia, os investimentos faranse de xeito que tendan a reduci-los desequilibrios comarcais actualmente existentes.

Disposición adicional terceira

As axudas e subvencións concedidas con cargo ós Presupostos da Comunidade Autónoma, que non teñan nos mesmos asignación nominativa, serano conforme a criterios de publicidade, concorrencia e obxectividade na concesión.

Para tal fin, as Consellerías correspondentes establecerán, sempre que non se trate da prórroga dalgún programa do exercicio anterior, e antes da disposición dos créditos, as oportunas normas reguladoras da concesión respecto da cada un dos conceptos presupostarios con cargo ós cales se pretenda concede-las axudas e subvencións, que serán publicadas no *Diario Oficial de Galicia*.

Disposición adicional cuarta

Os créditos consignados no Estado de Gastos, a financiación dos cales se produza a través de subvencións da Administración Central, podrán ser modificados pola Consellería de Economía e

Facenda co fin de adaptalos ós fondos efectivamente recoñecidos.

Disposición adicional quinta

Os artigos que a seguir se expresan da Lei 3/1985, do 12 de abril, do Patrimonio da Comunidade Autónoma Galega, quedarán redactados nos seguintes términos:

«Artigo 25

Correspóndelle á Consellería de Economía e Facenda acorda-lo alleamento cando o valor dos bens e dereitos, segundo a declaración de alineabilidade, non exceda de 10.000.000 de pesetas; ó Consello da Xunta, a proposta da citada Consellería, cando sobrepase dita cantidade; e ó Parlamento, mediante Lei, se excedese de 50.000.000 de pesetas.»

«Artigo 26

O alleamento farase mediante subhasta pública, salvo cando a Consellería de Economía e Facenda, se o valor é inferior a dez millóns de pesetas, ou o Consello da Xunta, nos demais casos, a proposta da Consellería de Economía e Facenda, autoricen expresamente o alleamento directo, mediante acordo motivado.»

«Artigo 34, parágrafo primeiro

O alleamento de bens mobles da Comunidade Autónoma responderalle ó titular da Consellería que os viñese utilizando cando o valor dos mesmos, logo de taxación pericial, non excedese de dez millóns de pesetas. Se superase a

devandita cantidade o alleamento acordarao o Consello da Xunta, a proposta da Consellería de Economía e Facenda e logo de petición daquela que os viñese utilizando.

En todo caso, canto se trate de bens calificados como de interés tecnolóxico ou informático, o alleamento será acordado polo Consello da Xunta a proposta da Consellería de Economía e Facenda.»

«Artigo 35, parágrafo segundo

Aplicarase o procedemento de contratación directa cando o departamento que os viñese utilizando, se o valor é inferior a 10 millóns de pesetas ou o Consello da Xunta, nos demais casos, e a proposta da Consellería de Economía e Facenda, así o autoricen expresamente mediante acordo motivado.

Se concorren varias solicitudes será preferible a que ofrezca un precio máis elevado, atendéndose á prioridade, se existise igualdade de condicións.»

Disposición adicional sexta.— Taxas.

A exacción da taxa por gastos e remuneracións en dirección e inspección de obras:

— Tarifas aplicadas polos servizos de obras públicas e polos servizos de transportes.

— Da taxa por servizos en materia de reforma e desenvolvemento agrario e da taxa por direc-

ción e administración de obras e traballos de conservación de solos.

Satisfaranse, se non se fixo con anterioridade, mediante retención directa ó momento do pagamento de cada unha das certificacións.

Disposición adicional sétima

O Consello da Xunta, a proposta da Consellería de Economía e Facenda e a iniciativa da Consellería de Ordenación do Territorio, poderá autoriza-la aplicación ó Presuposto de Ingresos dos saldos que se produzan como consecuencia do depósito de fianzas de arrendamentos urbanos e subministrados a que se refire o Decreto do 11 de marzo de 1949.

Disposición adicional oitava

Trimestralmente, o Conselleiro de Economía e Facenda daralle conta documentalmente á Comisión parlamentaria correspondente do desenvolvemento e execución dos Presupostos.

Disposición adicional novena

Mensualmente, expoñerase nos taboleiros de anuncios de cada centro de traballo a relación nominal dos traballadores que recibisen gratificacións por servizos extraordinarios, así como a súa contía, tanto no caso do persoal laboral coma nos dos funcionarios.

Disposición transitoria primeira

No ámbito das competencias que a Comunidade Autónoma de Gali-

cia ostenta en materia de vivenda, a Consellería de Ordenación do Territorio e Obras Públicas exercerá, con respecto a inmobles e dereitos reais inmobiliarios que lle fosen transferidos pola Administración Central do Estado ou adquiridos coa citada finalidade, tódalas facultades inherentes á súa xestión, administración e disposición, con independencia da súa contía, con carácter excepcional e en tanto que por Lei do Parlamento non se cree o organismo autónomo correspondente.

A aprobación dos expedientes de que se trate será ordenada polo Conselleiro de Ordenación do Territorio e Obras Públicas a proposta da Dirección Xeral de Urbanismo, Vivenda e Medio Ambiente, dándoselle conta dos mesmos á Consellería de Economía e Facenda.

Disposición transitoria segunda

O Presuposto dos servizos trasladados do Instituto Nacional de Servizos Sociais (INSERSO) axustarase ás normas sinaladas na letra E) do anexo I do Real Decreto 258/1985, de xaneiro, e ás previsións contidas no Presuposto consolidado da Seguridade Social para 1986.

Disposición derradeira primeira

Autorízase á Consellería de Economía e Facenda para que efectúe no Presuposto de Gastos da Comunidade as adaptacións técnicas que sexan necesarias

como consecuencia de reorganizacións administrativas, co fin de crealos programas, seccións, servizos e conceptos presupostarios que sexan necesarios, e autorízalas transferencias de crédito correspondentes. Estas operacións, en ningún caso, darán lugar a un incremento do gasto.

Informarase de todas elas á Comisión de Economía, Facenda e Presupostos do Parlamento, dentro do mes seguinte a aquel en que se producisen.

Disposición derradeira segunda

A presente Lei será aplicable ós organismos autónomos que se poñan a crear e ó seu correspondente Presuposto, que esixirá para a súa efectividade a debida aprobación parlamentaria.

Disposición derradeira terceira

Os gastos autorizados a cargo dos créditos do Presuposto de prórroga imputaranse ós créditos autorizados pola presente Lei. Caso de que no citado Presuposto non houbera o mesmo concepto ca no Presuposto para 1986 ou de que habéndoos resultase insuficiente, a Consellería de Economía e Facenda determinará o concepto presupostario a que se debe imputar o gasto autorizado e daralle conta á Comisión de Economía, Facenda e Presupostos.

Disposición derradeira cuarta

A Xunta de Galicia presentaralle ó Parlamento durante o exercicio

presupostario unha memoria explicativa dos investimentos correspondentes ó Capítulo VI da clasificación económica do Estado de Gastos, con explicitación dos déficits sectoriais e territoriais que deron soporte ás decisións de investimentos e xustificación, no seu caso, das razóns dos incumprimentos.

Disposición derradeira quinta

1. Os Presupostos das Deputacións galegas para o exercicio de 1986, aprobados polas respectivas Corporacións, ascenden ás contías seguintes:

A Coruña	11.374.155.614 pts.
Lugo	6.443.000.000 pts.
Ourense	8.188.000.000 pts.
Pontevedra	8.043.000.000 pts.

2. Para o exercicio de 1986 a Xunta de Galicia, na procura do interés xeral da Comunidade Autónoma, e no afán de evitar disfuncións nas actuacións das distintas Administracións Públicas, procederá, polos mecanismos adecuados, a unha máis efectiva coordinación das actividades das Deputacións galegas, co obxecto de eliminar as discriminacións e solapamentos.

Disposición derradeira sexta

A presente Lei entrará en vigor ó día seguinte da súa publicación no *Diario Oficial de Galicia*.

(5)

Santiago de Compostela, 29 de outubro de 1986

Xerardo Fernández Albor
Presidente

(5) O anexo incorporado a esta lei non se reproduce nesta edición.